

## Forum da votaziun

## La protecziun cuosta daman daplü co hoz

Avant tschient ons s'haja cumanzà in Svizra a fabricar sarineras, la prüma l'on 1917 a San Gagl. Quai nu d'eira bunmarchà, ma id ha vaglù la paina. Tuots e tuottas profitan dals flüms e lais nets e da pudair baiver l'aua da la spina. Scha nus nu vessan installà las chanalisaziuns e las sarineras, lura gess la glieud richa in Canada a pes-char, illa Caribica a nodar e bavess l'aua da Nestlé, la glieud povra però vess da patir.

Quai cha nus vain fat cun l'aua, stavaina hoz far cul clima. Plü lönch cha nus spettain cun las masüres e plü ot chi sarà il pedsch cha nus varan da pagar. Intant cha nos vadrets svanischen, han oters pajais da patir da süttinas o dad inuondaziuns. Il clima tanghescha

a tuot il muond e sia protecziun po be reuschir scha tuot il muond contribuischa sia part. Perquai racumonda il parti socialdemocrat ün schi a la ledscha davart la protecziun dal clima.

Eir ün schi racumonda il ps per la ledscha da Covid, insè üna votaziun chi nu fess dabsögn. Pel proget da l'OECD racumondaina ün na. L'imposta minimala per las grondas interpraisas es insè üna buna roba, ma il scumpart da las entradas tanter ils chantuns es fich ingüst. Perchè dess Zug, il chantun il plü rich e plü pitschen, surgnir 240 milliuns l'on, il Grischun però be tschinch milliuns? Il ps pretenda cha quist vegna müdà.

Parti socialdemocrat  
Engiadina Bassa



Marcia Bieri e Nora Engels s'allegran da lur victoria. Las chotschas cuortas chi han fat la cuorsa a Sur En – al 29avel simposi da sculpturas.



fotografias: Benedict Stecher

## Arrandschamaints

## La biodiversità da Valentin Pitsch

**Fuldera** In marcurdi, ils 14 gün, preschainta Valentin Pitsch sias fotografias fascinantas chi dan perdüta d'üna vasta diversità da bes-chas e plantas in Val Müstair. El referischa davart il tschess barbet, l'alvetern e la biodiversità in Val Müstair. L'arrandschamaint ha lö illa

chasa cumünala da Fuldera e cumainza a las 20.15.

Quist arrandschamaint vain organisà tanter oter eir da la Biosfera Val Müstair ed es üna part dal program da stà cun occurrenz per giasts ed indigens. (protr.)

## Maisa da mezdi La Paluotta

**Scuol** In venderdi, ils 16 gün, ha lö la prosma maisa da mezdi organisada da la società La Paluotta a Scuol. Chi chi ha vöglija da s'inscuntran e da pas-santar ün giantar in cumpagnia es bainvis. La maisa da mezdi düra da las

12.00 a las 14.00 ed ha lö illa chasa pravenda a Scuol. L'annunzcha fin in marcurdi, ils 14 gün, a las 12.00 es obligatorica. (protr.)

Annunzchar per la maisa da mezdi sün  
0788426179

## Teater «Romeo e Julia» ad Avrona

**Scoula Rudolf Steiner** Lavur da teater es importanta illa pedagogia. Las experienzas cha'ls uffants e giuvenils pon far, sun fundamentalas per fuormar l'aigna personalità. Ingon s'han las scolaras da l'ottavla classa da la scoula Rudolf Steiner a Scuol s'occupadas cul toc classic da William Shakespeare «Romeo e Julia». Ellas han scrit

üna versiun scurzida ed inscenà ed exercità quella insembel cun lur magister, Helmut Wallnöfer e lur conscolaras e lur conscolars da la tschinchfin ottavla classa. Quista lavur preschaintan els in venderdi, ils 16 gün, a las 17.30, ed in sonda, ils 17 gün, a las 19.30 illa sala da festa da la Scoula d'Avrona a Tarasp. (protr.)

## Chotschas cuortas fan la cuorsa

**Per la 29avla jada ha Art Engiadina organisà il simposi da sculpturas a Sur En da Sent. Quist on han partecipà 18 artistas ed artists dad ot pajais. Sonda passada han quels festagià la finischiun da l'evenimaint insembel cullas vendschadras Marcia Bieri e Nora Engels.**

Dal 1994 ha gnü lö pro'l camping a Sur En da Sent la prüma ediziun dal simposi da sculpturas. Quel vain organisà da la società Art Engiadina. Dü-rant ün'eivna s'inscuntran adüna in gün ils artists e las artistas e lavuran sül areal dal camping cun divers materials vi da lur sculpturas. Quellas sun fich differentas e vegnan lura plü tard forsa plazzadas sülla via da sculpturas chi passa in ün gir da var tschinch ki-

lometers i'l contuorn dal camping da Sur En.

Hozindi es il simposi ün'instituziun illa scena d'art da la regiun ed üna sporta turistica chi nu das-cha mancar i'l chalender d'arrandschamaints.

## Il public ha valütà

Las sculpturas vegnan adüna valütadas dal public chi piglia part a la vernissascha a la fin dal simposi. Tuot las 18 ouvras da quist on d'eiran preschaintadas in sonda davomezdi sülla piazza dal camping ed a dretta da la via chi maina a Sur En. E tuot las artistas ed ils artists sun stats preschaints quist on a la vernissascha. Ils visitaduors han gnü uschè eir la pussibilità da discuorrr cun els davart lur lavur artistica. Las 18 sculpturas da quist on – our da lain, crap e marmel – han però dat grond rumpatesta pro la valütaziun.

A las 17.00 sun lura gnüts surdats ils premis d'ingon. Quels sun its a las duos artistas Marcia Bieri cun atelier a Landquart ed a Nora Engels da Same-

dan. Las duos artistas sun statts stuttas d'avair guadagnà ed han muossà quai cun fermas emozziuns. Lur sculptura victura nun es inguott'oter co ün pèr chotschas cuortas our da lain.

## Ingün event d'inviern

Art Engiadina es üna società chi vain presidiada da Daniel Bosshardt. La società organisescha il simposi da sculpturas e mantegna la via da sculpturas a Sur En. Ma ella ha eir fingià organisà events d'inviern, cun palazis e sculpturas da glatsch e cun igluminaziuns e projecziuns spezialas.

Art Engiadina ha salvà sia radunanza generala güsta in sonda passada, avant la vernissascha dal simposi. E sco cha'l president da la società, Daniel Bosshardt, ha dit invers la FMR, saja quella radunanza ida «sainza cumplacziuns». Però el ha eir manzunà: «Nus vain decis da nu far ingüins events quist inviern chi vain e vain gust da la bella festa dal di dad hoz.»

Benedict Stecher/fmr

## Hürlimann, Fendt e Bühler s'haun inscuntros

**Per la quarta vouta es sto l'inscunter da tractors oldtimers in Engiadina. Var 100 tractors haun fat quista fin d'eivna fermativa e canera a Madulain, inclusiv divers girs i'ls contuorns.**

Almain 25 ans stöglan ils tractors avair per ch'els suos-cha as numner «oldtimers». Ils Hürlimanns, Bühlers e Fendts chi haun fat in sanda passada ün gir cumünai vel partind da Madulain, accumulachan tuots quist criteri d'eted.

La società organisatura Almatrak vaiva fat quint cun var 75 tractors, a la fin sun gnies 95 tractors – taunts scu auncha më. Que ho dit Nuot Padrun, organisatur da l'inscunter, invers RTR.

## «Bgers faun fotografias»

Ils pü vegls tractors varon intuorn 70 ans. E rivos in Engiadina suni da tuottas varts – da l'Engiadina e la Val Müstair, però eir dal rest dal Grischun e perfin sü da l'Argovia, Turgovia u dal Principedi da Liechtenstein. Och tractors sajan perfin partius già in mardi davent da Berna e sajan lura rivos in venderdi in Engiadina. Per Nuot Padrun es quist inscunter ün plaschair, scu ch'el ho dit in ün'intervista cun RTR: «Dad ir in gruppa es üna bellezza. Eir scha nus fains gnir nar ad ün u l'oter automobilist, perque cha nus essans plauns. Ma bgers ferman eir e faun fotografias.»

## Almatrak Engiadina

L'inscunter da tractors oldtimers vain organiso da la società Almatrak Engiadina. Almatrak sto per «Alte Maschinen und Traktoren». Mincha duos ans es l'inscun-

ter da tractors vegls in La Plav, ils ans traunteraint es l'inscunter a Filisur. Zieva cha tuot las vschinaunchas da La Plav sun stedas landervi, varon ils inscunters in avegnir adüna lö a Zuoz. (rtr/fmr)



Nuot Padrun, organisatur dal quart inscunter da tractors oldtimers a Madulain – dasper sieu egen tractor da la marca Hürlimann. fotografia: RTR

## cunvegna da cunfinaris - abiter - energia

## Occurrenza publica d'infurmaziun

mardi, ils 20 gün 2023 a las 20.00  
Hotel Laudinella, San Murezzan Bagn

A refereschan:

**Anna Giacometti, cusgliera naziunela**  
mancanza da persunel qualificho e cunvegna da cunfinaris Svizra – Italia

**Martin Schmid, cusglier dals chantuns**  
planisaziun dal territori ed abiter

**Martin Merz, impressari**  
proget da fotovoltaica a Samedan

Moderaziun: Markus Berweger, candidat per il Cussagl naziunel

Nus ans allegrains d'üna numerusa cumparsa!  
la suprastanza

**FDP**  
Die Liberalen  
Oberengadin Bregaglia